

Adi Thijsen riba participacion na eleccion 2021:

"E balor agrega di un persona ta determina su posicion politico"

ORANJESTAD (AAN): Mirando cu 2021 ta aña di eleccion, durante un entrevista DIARIO a proba-cha di puntra presidente di Parlamento Adi Thijsen su plannan pa loke ta si e ta sigui den politica of no y si e ta subi riba lista di MEP un biaha mas.

E parlamentario a cuminsa na bisa cu ora cu bo asumi e responsabilidad pa drenta politica, bo sa cu esaki ta bay cu un sacrificio y cu tin hopi consecuencia mara

na dje.

"Prome cu mi a drenta politica mi tabata abogado y mi a lucha hopi y mi a sacrifica hopi pa mi yega eynan".

Mi a traha hopi duro y mi a 'build up' mi mes, pero ora cu pueblo y specialmente pueblo di Savaneta a haci un apelacion riba mi via partido MEP, pa mi asumi e responsabilidad pa representa Savaneta ora cu Fredis Refunjol a bira Gobernador, tabata un honor y

privilegio y mi a haci esaki, segun Thijsen.

El a bisa cu e tabata sa cu esaki tabata bin cu un sacrificio, pero cu un persona cu ta para pa su principionan y semper tabata pro e partido social democrata MEP, el a subi e lista cu placer y honor.

Segun e presidente di Parlamento, el a drenta Parlamento y nunca el a pensa cu e lo keda asina tanto aña.

"Aruba ta un isla chikito y ora cu bo ta un abogado, docter, empresario etc., ta dificil pa combina esaki cu e trabao di parlamentario". Ora cu a bin e asina yama 'versoberingswet' mi mester a scoge y mi a scoge pa sigui den Parlamento y sacrifica mi profesion como abogado pa cumpli cu pueblo.

Mi a haci esaki apesar di e hecho cu como abogado mi tabata gana dos biaha mas cu como parlamentario, segun Thijsen.

El a sigui bisa cu den politica bo bidá ta cambia pasobra na diferente ocasion bo tin cu wanta palabranan di insulto of menaza for di hendenan.

Segun e parlamentario, den su bida politico el a pasa den cierto puntonan cardinal, incluyendo e problema cu el a haya na 2007 cu e tempo ey minister Marisol Lopez Tromp.

"Nos a sali afo cu otro, pero e asunto ey tabata tin consecuencianan pami y a wordo papia hopi riba e caso aki".

Tabata tin partidonan politico cu a acercami y tabata kier pa mi bula cura, pero mi no ta un bulado di cura. Mi tin principionan y mi ta para straight, segun Thijsen.

El a sigui bisa cu hendenan ta lubida cu e ta un profe-



sional, un homber studia cu un experiencia di 16 aña den Parlamento, incluyendo como lider di fraccion, parlamentario den oposicion y presidente di Parlamento.

Segun Thijsen e tabata tin posicionnan den Parlatino y den Ipko tambe.

"Mi conocemento y experiencia ta grandi y mi ta un abogado, kiermen cu mi por bay sector priva tambe".

Tami tin cu dicidi unda mi kier bay na dado momento, pero semper bo mester duna respet na e organizacion cu bi ta pertenece na dje.

Ta mescos cu ora cu bo ta den un team di futbol, unda cu e miembronan di e team mester traha na beneficio di e team.

Cada hungador mester conoce su rol y ta e organizacion ta tuma decisionan si un hungador na dado momento ta drenta den e staff, of e por wordo laga bay, of e ta keda pa durante 4 aña mas yuda esnan mas jong den e partido, segun e presidente di Parlamento. El a sigui bisa cu experiencia ta conta hopi sigur.

Ta e organizacion mester trece dilanti con nan ta wak bo rol.

"Mi tin derecho riba pensioen, pero ta sintimi bon

ainda".

Mi por drenta sector priva y traha como consehero, director etc., pero mi ta pensa riba mi famia tambe y mi tin cu dedica tempo na nan, mirando cu durante 16 aña tabata dificil pa dedica hopi tempo na famia.

No solamente riba mi mes y mi organizacion mi tin cu pensa, sino tambe riba pais Aruba, segun Thijsen.

El a sigui bisa cu specialmente den e temponan dificil aki e tin cu pensa riba cu kico e por contribui pa yuda e pais.

Segun e parlamentario, tur cos ta depende di e organizacion, pasobra e por bay 1 eleccion mas, si MEP gana e por bira minister, e por bay bek den Parlamento of e por bira por ehempel minister Plenipotenciario etc.

"Hunto bo ta yega pa e compromiso riba unda mi por contribui mihor na mi pais", segun Thijsen.

DIARIO a puntra Thijsen kico su decision lo ta si lider di MEP pidie pa e bay eleccion un biaha mas y el a bisa cu e lo evalua kico e ta bay haci, pasobra e mester ta na beneficio di e pais.

"E balor agrega di un persona ta determina su posicion politico", segun e presidente di Parlamento.